

## Resultadonan di Scol Basico pa añanan escolar 2009-2010 te cu 2012-2013

E aña escolar 2013-2014 ta tras di lomba. Pa cada alumno e aña escolar tin un resultado sea positivo of menos positivo. Ban tira un bista riba e resultadonan di enseñanza pa scol basico y e transicion di scol basico pa scol secundario pa e scolnan publico y e scolnan subsidia door di gobierno (S.K.O.A., S.P.C.O.A. y S.V.E.O.A.) pa cu e añanan escolar 2009-2010, 2010-2011, 2011-2012 y 2012 -2013 (Fuente: Departamento di Enseñanza y Inspeccion di Enseñanza).

Por lo general e mayoria di muchanan di scol basico ta bay over, pero tambe tin muchanan cu ta keda sinta, muchanan cu ta bay over door di nan edad y muchanan cu ta bay un scol cu ta brinda educacion special.

Den 1<sup>o</sup> klas di scol basico, un promedio di 79% di muchanan ta bay over, cual ta e porcentahe mas abao di muchanan cu ta bay over si compara cu klas 2 te cu 5 (wak figura 1). Den klas 2 y 3, e porcentahe di muchanan cu ta bay over ta subi te cu 86% y despues ta baha te cu 80% den klas 5. Den klas 1 te cu 5, un promedio di 82% di muchanan ta bay over.

Na e start di scol basico, den 1<sup>o</sup> klas, e porcentahe di muchanan cu ta keda sinta ta mas halto compara cu e porcentahe di muchanan cu ta keda sinta den otro klasnan di scol basico. Den 1<sup>o</sup> klas un promedio di 16% di muchanan ta keda sinta. Den transcurso di e otro klasnan e porcentahe di muchanan cu ta keda sinta ta bira relativamente menos y ta baha te na 8% den klas 5.

Banda di e muchanan cu ta keda sinta tambe tin muchanan cu ta bay over door di nan edad. Esaki kiermen cu nan no ta bay over door di suficiente

puntuacion, pero door cu nan edad ta halto pa e klas cu nan ta aden. Den 1<sup>o</sup> klas, un promedio di 4% di muchanan ta bay over door di nan edad.

Den transcurso di e otro klasnan, e grupo di muchanan cu ta bay over door di edad halto ta keda crece y ta triplica, te na un promedio di 12% den klas 5.


Muchanan cu den transcurso di scol basico tin dificultad cu e nivel di siñamento, por haya e conseho pa bay un scol cu ta brinda educacion special. Na final di 1<sup>o</sup> klas, 1% di muchanan ta bay un scol pa educacion special. E porcentahe aki ta keda igual na final di klas 2 y klas 3. Den klas 4 y 5 tambe tin un cantidad limita di muchanan cu ta bay educacion special, pero e porcentahe di muchanan ta menos cu 1% di e total.

Pa cu e muchanan den 6<sup>o</sup> klas cu mester haci e transicion pa scol secundario nos por mira e siguiente promedionan den transcurso di añanan escolar 2009-2010 te cu 2012-2013: 20 den cada 100 mucha ta bay EPB (20%). 59 den cada 100 mucha ta bai MAVO (59%). 19 den cada 100 mucha ta bay Ciclo Basico HAVO (19%) y 2 den cada 100 mucha mester ripiti 6<sup>o</sup> klas di scol basico (2%).

Interesante ta pa sigui analisa e trayectoria di alumnonan den scol basico y scol secundario den transcurso di añanan. CBS lo publica e resultadonan di e aña escolar 2013/2014 manera e cifranan bira conoci.

CBS ta desea tur alumno un dushi vakantie y hopi exito den e aña escolar venidero.

Figura 1: Resultadonan di scol basico 2009-2010 te cu 2012-2013



Fuente: Departamento di Enseñanza y Inspeccion di Enseñanza